

四庫全書

集部

欽定四庫全書

秋澗集卷九十

元 王惲 撰

便民三十五事

自此條監  
司時建白

皇帝聖旨裏中議大夫治書侍御史行御史臺事伏見  
朝廷勵精為治百度從新中外顯顯有太平之望然弊  
積日久事端非一必更張其大者重者使有定制則實  
惠可及於民今國家疆宇民數遠過漢唐歲入經費又

為不貲所急者立法選官恤民息兵力養人材節浮費  
之用停不急之務而已蓋大法立則宏綱振庶官舉則  
萬務修兵民安則邦本固人材廣則任使周省費用則  
百姓足停不急則農務勸至於侵奪民利不便於時者  
一切革去之然此要須大臣力任其責以經國遠圖為  
念使治體一定始終無間開誠心布公道授羣材而作  
行之使上有所守而不勞下知奉行而不亂尚虞箝勒  
未嚴吏有勤惰明其賞罰黜陟以威厲其不事事者將

見激昂奮發人爭立效則治定功成可計日而待也不  
然究錢穀之已然緩綱維之大柄未見其可也某以不  
材謬當言責區區之誠有不能自己者謹條陳切時便  
民三十五事開列于後伏乞御史臺備呈中書省照詳  
施行

事目

立法

定法制

置發兵符契

通行奏事

選官

議保舉

立審官院

選參佐

卹民

議卹民

除軍戶閔下差發

捄災

秋稅准喂養馬駝草料

復常平倉

論匠戶

括戶土斷

七品以上官言任內利病

息兵力

軍人交番

緩遠征

合併十年軍

定奪軍戶析居地稅

養人材

設學校

附復立國  
子學議

用中選儒士

試吏員

節費用

古者因官府而立人  
今則因人而立官府

併州縣省官吏 行券法減祗應

禁醞酒

振武屯田

輸粟充監當官

停不急之務

權停一切工役 省罷鐵冶戶

侵奪民利不便等事

課程再不添額 論鈔法

論鹽法

輝竹還民

分閒官占民田 定奪官地給民

禁約侵擾百姓

立法

定法制

自古圖治之君必立一定之法君操於上永作成憲吏  
行於下視為準式民知其法使之易避而難犯若周之  
三典漢之九章一定不易故刑罰省而治道成今國家  
有天下六十餘年大小之法尚未定議內而憲臺天子



之執法外而廉訪州郡之刑司也是有司理之官而關所守之法至平刑議獄輟轉為理不免有酌量準擬之差彼此重輕之異合無將奉敕刪定到律令頒為至元新法使天下更始永為成憲豈不盛哉若中間或有不通行者取國朝扎撒如金制別定敕條如近年以來審斷一切姦盜省部略有條格者州縣擬行特為安便此法令當亟定之明驗也如此則法無二門輕重當罪更無以高下其手天下幸甚

置發兵符契

竊見朝廷防馬劄妄濫也御前給發奉使欲遠方取信也佩圓符為徵况兵戎大事乎近者王著矯偽發兵利害非細合議關防契勘厯代緩急調遣兵馬皆驗符契然後得發今後合無依上起置符契庶免臨時別致事端

通行奏事

竊見憲臺初立遇有軍國重事中書省臺院約會一同

聞奏若事或不便許廷議以從所長其於朝廷大為有益近年稍乖舊制至於大政大刑其事已行不得與聞任言責者既不及論救且得箝口不職之謗于天下乞請申明舊例不致似前濶畧以絕壅蔽天下蒙幸

選官

議保舉

夫親民之官守令為急竊惟選法自近年大壞後府州司縣官例多阿權通賄僥倖而得其南選尤濫至目之

曰海放此等賢否不較可知庸懦者因循苟且奔走承奉外政務盡廢小材者視時所尚營治已私略不以官事為念爰自新政以來外望雖聳根源舊弊依前未除易舊而新今雖汰冗濫選材能然一或譽之則為賢一或毀之則為否是非惑亂終無所憑莫若將素有聲迹資品實至者令三品官入狀舉保量短長之材授小大之任然後明察臧否精覈殿最得人者行進賢之賞謬舉者坐不當之罰舉官自然精詳受保者惟恐有累如

此則官得其人庶事修舉昔周世宗令除目仍署舉者姓名若貪穢敗官並當連坐金朝正大間亦行此法當時號稱得人方今教養無素科舉未行權宜矯弊似為良法

立審官院

竊詳省院臺部皆得選署官屬若公當則人心自服稍或未安中外之人皆得指言數年以來省臺壞亂多此之由夫省臺大僚近君之重臣也古人稱投鼠忌器當

尚深戒況天官天秩一旦使羣小得恣情阻壞非所以  
體重臣而存大體也兼若輩處心鮮公不為已私且泄  
怨謗比比若此合無立審官院選用有德望公正大臣  
次取知典故識大體剛直而敢言者為之輔其中外一  
切選舉官員通得論列而疏駁之不猶愈于若此紛紜  
之不定也耶檢會得金朝章宗時臺司用一諸科人為  
監察審官院竟奏而罷之致臺望增重遠近肅然當時  
大為有益或曰若立此官臺諫何為曰臺諫論列至廣

審官係封駁之事古人設立以用人為為治之本惟其責之專則事精詳而得實理所謂開公道而庶人不私議也伏乞熟慮而深思之

選參佐

近聞朝省選用隨路總管其法甚妙然參佐尤當精析所謂掌司經歷者務要識大體有議論通案牘臨事不疑剛正有斷振一路之紀綱辦大小之衆務下至調和官府驅役吏人上下伏從官長有賴方為稱職近年往

往用非其人不惟誤事且復害事如非流望者有之不  
通文墨者有之老病庸懦不勝任者有之如得其人斯  
弊盡絕契勘至元二年隨路總管許令帶行參佐二員  
此固唐自辟所知良法今既妙選大尹亦宜令各官保  
所知職官以任參佐却恐朋黨成風因時作弊莫若將  
保到人員交相為用如真定府尹所保用之保定保定  
所保用之他路之類是也若本人任內污濫不職保官  
亦行坐罪其各道按察司首領官非常依上精選使出



總府幕職之右庶幾官吏推服臺綱人望因之取重

卹民

議卹民

竊見隨路百姓自攻取襄樊以來節次將中強等戶簽充軍站其見在下戶供給百色軍需已是生受及江南平定中外佇望庶得休息復致前政煩苛橫取白著急於星火州縣官吏視其如此因緣作弊科斂無度如遇和雇和買夫役等事即驗包銀分俵每一兩週歲約出

橫泛錢三十餘貫止以四兩戶論之是一歲著二十倍也又軍戶逃戶閃下差稅復灑見戶包納割剥民肌未見如此之甚致愁嘆不絕感傷和氣歲旱不收百物湧貴衣食艱難民安得不困救之之方在於將和雇和買必不可闕者畫時支價兩平和買雇賃並不科徭民間饑荒去處官為賑濟累年逋負已徵入官者還民未徵者盡免其逃亡復業者付原拋事產量免三年差役庶居者安集而去者思還然後下寬大之詔布告中外使

民曉然知朝廷優卹元元本意又阿哈穆特及其黨與所沒贓賄不可勝計此物既非天來皆係生民膏血向肆威虐聚為己私可謂贓穢不祥之物昔漢籍梁冀家財遂克國用減天下租賦之半散其苑囿使業窮民合無亦將上項財賄全代天下今歲租賦之數使二十年愁怨之苦一旦消釋誠國家結民心感和氣其曠蕩希世之恩過於尋常萬萬也

一照得近年和買造作等事其弊有三如立限甚促畫

時不支價錢必須科派民間然後可辦致百姓添價  
轉買或官吏搭攬多搭錢數及取納使用糜費等錢  
上下通同作弊一也縱降到價錢止依各處虛報時  
估比之百姓實費不及半價虧損人戶二也其官降  
不敷價錢內官吏又行剋減且有全不到民或三五  
年間並不給降者三也如近日科下真定皮裘皮袴  
明該不得檣派百姓官給見錢官無見錢皮無見在  
送納有程却恐耽悞不免分科民間其弊依然復作

是上司實有愛民之心而百姓名受其惠而隱受其虐也今欲革弊不過降給見錢從實支價責委正官辦集其事何則蓋近年遇有工役官長但領畧其間率委本把里正信實等人營辦將百姓恣行侵牟無有紀極或事發到官止將上項人量情追斷民苦已受將何所補若革去三弊將一切違錯明該止坐正官不究餘者庶幾多方用心顧恤百姓不致里正諸人作弊

一隨路遞運車仗腳錢近者五六十貫遠者不下百貫官支價錢十不及二三其不敷數百姓盡行賠備名為和雇其實分著年來披擔極是生受乞請驛程去處官立車甲頭兩平雇募從實支價以紓民力

一戊戌年中選儒戶比之僧道百分無一前省收入民編却有告難蠲除者合無依舊除免併十三年試中儒人亦行一體定奪

一弛山林河泊材木魚蒲之禁令民得恣採取以掇饑乏不足

除軍戶閃下差發

查爰自收復殘宋以來人皆有息肩之望近年差役豈惟不蒙減免又將九年十一年內原簽軍戶差發每戶止除四兩餘有數目俱於見在戶內橋科及自戊午年准申逃戶之後續逃戶計上司並不准申州縣亦不敢申報閃下差發仍令見在戶計包納又至元七年取勘

出協濟戶計原奉條畫止令協濟見當差戶近年編造  
入額另行科差加以和雇和買不絕如流比之初取裏  
樊差役轉增數倍上司若不哀矜量加優恤恐不免轉  
徙流離之患乞將原簽軍戶氣力全行除豁及取勘續  
逃戶計蠲免分數庶望貧民少得休息實為便益

抹災

竊見今歲真定等處春夏亢旱穀菜皆無米價湧貴小  
民久已闕食往往採食青棘槐花榆葉拂子等根加之



流竄驚擾甚為不安諺云春旱泥倉秋旱離鄉蓋言比  
接新來歲月日遠故也百姓多趨熟河南今者米粟亦  
貴愈無所往是將坐視饑饉以待其斃其救之之術宜  
在於早設不然不過發倉廩散楮幣倉廩所在皆空寶  
鈔幾許得濟莫若將被災州縣合納稅石併即今收糴  
事故等糧盡行停免使百姓少寬且得自救責委按察  
司親臨官吏多方置計賑濟饑乏及弛山林河泊之禁  
權停門攤酒醋等課庶幾不致流亡失所

秋稅准喂養馬駝草料

竊見保定等路百姓每歲撥赴遠倉送納又椿配各和買各位下馬駝所用草粟設立倉場官收支中間官吏作弊百姓重併生受如按察司每歲各處追首鈔使民免遠倉納稅之勞有三五百錠者盡係添搭多取于民若於百姓所納秋稅內盡行折作草粟赴各處喂養馬駝倉場送納使民免遠倉納稅之勞無和買椿配之擾及革去給降剋減之弊實為便益

復常平倉

竊見至元八年設立常平倉驗隨路戶數收貯米粟約八十萬石以備緩急接濟支用近年以來起運盡絕甚非朝廷卹民拯荒本意如往年差官定奪時估以平物價縱使能行終非久遠通便之法當時僉謂若常平有粟各路不過依時價出糶三五千石則物價自平人心倚安低昂權在有司兼併不復高下其手向前收成去處依前收糶以實常平恐亦恤民平估之一策也

論匠戶

一省部為各處富强之民往往投充人匠影占差役以致靠損貧難戶計奏奉聖旨差官與察司總府一同磨勘到各戶根脚氣力手狀已是精當類攢冊帳各路赴部分簡實為善政中外喜望比及今歲科差必得上項富戶依應當差庶幾貧難稍得息肩近聞省部止為外路帳冊體式與大都不同此上差官復同三家再行磨問不惟中間動搖實恐遷延有失人望若將已分簡定

帳冊勒令各路照依大都體式攢報以望善政早得成就或謂若依已行體例將匠戶富强者還民當差其見當身役止除一丁差稅却恐一家兩役日久靠損人難終致紛紜不定莫若將見行分簡匠戶委係高手人匠存者存之外據戶眼高手藝平常者放罷為民若必須補添再於民間將酌中戶內取手藝極高者充庶免紛紜不定且失民望其江南戶口一家分作數戶其名甚多其數不實

括戶土斷

國家自壬子歲抄數後迄今未嘗通檢中間等第高下  
大成偏重故唐制三載一定戶每歲一團貌恐因仍舊  
額貧者轉貧富者愈富況三十年之久稍候年歲豐收  
民大安息合行從實檢括察其存亡均其貧富則庶功  
以興國富家足不然是縱令州縣每歲增減高下以滋  
官吏之弊故前人云與其潛資于姦吏何若均助于疲  
人以免其偏苦哉其各路流徙戶計拋下差務即令盡

行棧洒見戶賠納徃徃靠損人難今四海一家民之去  
此即為逋逃寓彼即為見在若通行括數只令彼處土  
著當差除此之逃額實為便當此厯代遺制我如行之  
不為無例或曰恐涉動搖曾不思偏重包納不均之苦  
甚於一動多矣

七品以上官言任內利病

竊詳方今大病國之惠化下罔盡行民之情偽上不周  
知今後合無令外路五品官部內利病可以興除者許

令任內或秩滿赴部直言要以指陳實事一出已見庶使民間疾苦艱難悉得上聞其官之盡心與否不校可知其當興除者即諭所司施行日新政治誠表裏相維上下盡心之良法也

息兵力

軍人交番

一隨路軍人爰自南征以來攻城野戰萬死一生及平定江南舉望停征稍得休息今軍前勾起逃亡事故等



軍歲無虛月如父死子繼兄亡弟行以至一戶有病歿  
陣亡父子兄弟四五丁者又有死絕止存老父母與妻  
孥者尚然不蒙撫存况征南將校例多遷賞其軍士亦  
宜優卹合無將見屯戍軍士或二年或三年使之分番  
相代省家父母親戚歲時有相會之樂所謂悅以使民  
民忘其死契勘唐制征防軍年及者還民父母八十者  
聽一子歸侍况今四海一家正息馬論道之秋如兵戎  
稍寢天下幸甚

緩遠征

伏見方今聖德天覆海宇一家獨以日本未霑王化致  
煩征討竊詳倭奴自後漢始通中國多以義懷來未聞  
專事征伐蓋限隔洋海數千里之遠此與彼接我以衆  
命先嘗其險嗚呼殆哉昔三苗來格虞帝以修文為先  
後倭始通光武以廣德為務伏望聖朝鑒法前代先遣  
材辯綏遠之臣申之以文告喻之以逆順柔以文德結  
以恩信使民見包荒不遐遺之意若猶未至然後興師

未為晚也此係國家大事任責者宜悉心以明其利害  
合併十一年軍

竊見近年朝廷將舊軍與至元九年所簽軍貧難消乏  
之家皆行合併甚為便益其十一年所簽軍人當時已  
是近下戶計經今九年多有生手不堪役者合無一體  
從實合併使貧富難易兩得均平又得兵力精強且見  
國家同仁一視之義

定奪軍戶析居地稅

一軍戶析居貼戶即目見行取要地稅當間本是一戶  
謂如有田六頃除四頃外納餘上稅石既是析居其地  
兩分各有地三頃不在合納之數即目止憑一戶時取  
要餘上地稅理合分間定奪除免

### 養人材

#### 設學校

夫自昔設立學校非唯尊師重道蓋欲養育人材以備  
內外任使方今名儒碩德既老且盡晚生後輩以上乏

教育下無進望例皆不學而吾道不絕如綫設若構一大厦必用衆材可成況治天下之廣居乎今府州縣道雖設立教官講書會課止是虛名皆無實效其隨處教官冷署寒毡餬口不給奚暇治禮義而及人若與醫學一體給降俸祿復官撥學地資贍主理然後選職官子弟及鄉民之秀異者使之入學專以講明經史以趨有用實學不三五年間一處止有成材五七人則天下可得數百人以須國家之用豈不偉哉如以後設立科舉

尤須預先教養不然將見數年之後非惟無材可取恐禮義廉恥掃地矣將何以論治乎隨路醫學亦合一體整理施行不致虛請俸錢有名無實

議復立國子學

附

竊見至元七年朝廷立國子學命許衡為祭酒選朝右貴近子弟令教授之不滿五歲其諸生俱能通經達理彬彬然為文學之士及其入仕皆明敏通疏果于從政如子諒侍儀之正大子金中丞之剛直康提

刑之仕優進學弟親臣之經明行修堅童君永之識  
事機子亨待制之善書學企中客省之貞幹揚歷省  
臺蔚為國用豈小補哉必欲設學校養人材京師首  
善之地宜先復立國學以風勵天下

用中選儒士

竊見十三年隨路試中儒人於內多有材堪從政者若  
委自各路并按察司取勘相驗得實申報上司遇臺院  
六部百司按察司令史書史闕員以憑補充勾當是猶

勝謬亂雜取州縣無例無學等人此輩設若吏業非素  
終是通曉義理例有文筆使官事稍習皆可勝用假令  
學校吏試便行須待歲月猝急不能得用能此不但捷  
於得人亦是激厲天下為學之方豈為小補兼金人舊  
例臺掾書吏皆於終場舉人內試補勾當但在有司持  
擇使之精當不致妄濫請託而已

試吏員

竊見方今內而省部臺院百司外而按察司府州司縣



合用吏員俱出自州縣校書貼寫等人因而上達以致  
僥倖成風廉恥掃地只以學術無素選取無方中間求  
其廉慎可稱熟練吏事者甚鮮而天下之務繁而詞訟  
錢穀重而刑名銓選生死曲直高下與奪悉出於乳臭  
若輩之手欲望治道清明風俗美好難矣合無講究近  
代考試法式從府州官公共保舉其法律刀筆行止或  
不相應罪及保官其餘非此而進者不許補充隨朝勾  
當設法既嚴人自力學如此非惟用得羣材禮義廉恥

風動四方下可以革去僥倖苟且之人上可以成公平  
肅清之化端本澄源此最急務

節費用

併州縣省官吏

伏見方今州而為府縣而作州復有不必縣而縣者此  
盖王進建言欲務為夸大以示外方意也以至增置人  
員添給俸祿無有虛歲彼所臨戶口曾不加多差稅轉  
成虛耗所謂十羊九牧為政大弊也今四海一家郡縣

版籍何止數倍夸大之名將何所用不若依舊便將當  
省者省可併者併豈惟事簡官清不致國家緣虛名而  
受實費既省其官據祿薄者亦宜增而厚之蓋清其吏  
而不厚其祿則飾詐而不廉知厚其祿而不省其官則  
財費而不足知省其官而不知選其能則事墮而不理  
此三者迭為表裏相須而成者也又江淮興兵以來諸  
道使府一切把軍官員權宜而置職及見設提舉司官  
及因聚賄妄立官府者多矣亦宜減削使職有常員事

不煩冗則人無紛擾之勞矣

行券法省祗應

今訪聞得真定路週歲祗應錢萬有五千餘錠以天下計之不下數萬錠矣此緣省部差遣繁冗及當該官吏因之作弊致費用如此之廣雖禁約關防甚悉不若澄治本根今後若路官得人凡事公幹并將急遞鋪整點如法據行下事務嚴立程限管得時刻不悞如是則不必使者旁午而重費館穀也若軍國大事必須差官者

照依前金給付券頭據合得分例令於上批寫某日經過某日宿頓回日繳納年終將報到祇應文冊查照同否多取並多與者同罪將見使人不敢多取掌行者不能妄添稍有分毫差別誠為方今節省費用良法至於朝廷重使別議給與如此減省故不少矣

禁醞酒

一目今自真定路以南直至大河地方數千里自春至秋雨澤愆期旱曠成災致米麥湧貴無處糴買例皆闕

食百姓往往逃竄莫能禁戢有司誠宜多方計置救災  
卹民竊見民間醞造秬酒所用米麥日費極多畧舉真  
定一路在城每日蒸湯二百餘石一月計該六千餘石  
其他處所費比較可知若依至元十五年例將民間醞  
造秬酒權行禁止庶幾省減物料以滋百姓實用誠救  
災息民之大事也

振武屯田

竊見每歲北邊於新城沙并靖州三倉和糴糧儲不下

五七萬石如遇軍馬調遣又豈特十萬石而已近年穀價湧貴且以十萬石為率所費不貲用度終不寬廣兼自古饋餉雖有智者終無良法惟邊地屯營最為長策契勘唐憲宗元和七年李絳言天德

今豐州

振武左右良

田約萬餘頃擇能吏可開置營田以省費足食從之四年間開田四千八百頃收粟四十萬斛歲省度支錢二十餘萬緡今體訪得振武與豐州界河兩旁地廣民稀除營帳牧放百姓耕墾外其餘閒荒地甚多若差公幹

官僚踏視其宜留兵營田一切取武清屯例假以歲月  
自非水旱不熟田功稍集國儲必有所濟故陸宣公云  
緣邊土沃而久荒所收必厚如此省費足食官無規措  
和糴之勞民免輸納虛耗之費恐亦安固邊防之一策  
也

輸粟除監當官

竊見上都北邊每歲臨幸及屯戍重兵歲用糧斛甚廣  
雖官司和糴商旅興販終是遠寫不能多廣得濟昔漢



文景時亦為艱于轉致令民輸粟塞下賜與爵級謂之  
賣爵級遂致邊兵饒足方今院務官別不見入仕格例  
以曩日論之不過貨賂請託若以弊革有益於國家不  
若令辦課官驗額輕重使輸粟上都及迤北州郡幾何  
者則任某處監當官一年立為定制謂如某處務場周  
歲課額十錠設官二員每員輸米或粟上都者若干迤  
北州郡者如之不半歲上都及緣邊州郡便得米數十  
萬石豈不大便益哉又如州府務官經營幹勾比得差

遣所費不貲一任之內必百方作計取償於民羨餘復入於已是使明損民力暗將官錢盡入私門若此法一行將見私錢盡入公家時息奔競官革請託軍國坐收饒足之利故令民輸粟充院務官最為當今良法

停不急之務

權停一切工役

竊見大都雜役五臺拖木等夫及諸寺院營造比年以來未嘗停輟古人有云工不使鬼必待人興財不天來

終須地出不動百姓將何所求況今真定至大河迤南  
年穀不登百姓罄罄例皆乏食自掄不暇據上項工役  
似合權且停放以見國家罷不急節浮費救災恤民至  
意

省罷鐵冶戶

竊見燕北燕南通設立鐵冶提舉司大小一十七處約  
用煽煉人戶三萬有餘週歲可煽課鐵約一千六百餘  
萬自至元十三年復立運司以來至今官為支用本貨

每歲約支三五百萬斤況此時供給邊用雖所費浩大  
尚不能支絕為各處本貨積垛數多其窺利之人用官  
司氣力收買其價不及一半當時既是設立提舉司煇  
煉本貨以備支持除支外止合存留積垛以備緩急今  
來却行盡數發賣竊詳此事虧官損民深為未便今來  
止合依驗舊日有名曾煇爐座存留三五處依例興煇  
據煇到本貨除支持外盡數存留積垛並不許發賣外  
據近年新添去處悉行停罷將所占百姓分撥所屬州

縣依例當差仍許諸人認辦課額興煽小爐或抽分本  
貨或認辦鈔數臨時定奪如綦陽鐵官中統二年省部  
已曾將治戶差發比較歲煉鐵貨數甚爭懸以此罷去  
其便與否乞追照原卷備見其詳

侵奪民利不便等事

課程再不添額

契勘課程自四十年前天下正額止萬有餘錠今者從  
萬至於十倍可謂極致每歲考較尚有增餘前省定奪

歲歲添作正額且財不天來皆自民出恐亦困人之一  
節也兼商稅金資物貨湊集買賣多寡市肆遷移皆趨  
州郡會合津要去處歲各不常若累累一體添額恐有  
輕重不等之弊可依已定額數外從實恢辦或依相承  
法增籌者量皆遷賞否者黜罰停歇暮年告敘所增等  
第以五十錠為上三十錠為中二十錠為下如此民喜  
額定而不增官樂有功而陞用羨餘之數自然盡實入

官

# 論鈔法

竊見元寶交鈔民間流轉不為滯滯但物重鈔輕謂如今用一貫纔當往日一百其虛至此可謂極矣究其所  
以法壞故也其事有四其至元十三年已後據各處平  
準行用庫倒到金銀并原發下鈔本課銀節次盡行起  
訖是自廢相權大法此致虛一也其鈔法初立時將印  
到料鈔止是發下隨路庫司換易爛鈔以新行用外據  
一切差發課程內支使故印造有數儉而不溢得權其

輕重令內外相制以通流錢法為本致鈔常難得物必待鈔而行如此鈔寧得不重哉今則不然印造無筭一切支度雖千萬錠一於新印料鈔內支發可謂有出而無入也其無本鈔數民間既多而易得物因湧貴而難買此致虛二也又總庫行錢人等物未收成預先定買惟恐或者先取故視鈔輕易添買物重幣輕多此之由此致虛三也又外路行用庫令庫子人等私下倒易多取工墨以圖利息百姓昏鈔到庫不得盡時回換民間



必須行用故昏者轉昏爛者愈爛流轉既難遂分作等級其買市物必需上等除是則必需搭價然後肯接此致虛四也今謂救其虛莫若用銀收鈔大路止用得課銀一二千餘錠小處一二百錠民間鈔儉必須將銀赴庫以倒換鈔貨是鈔自加重銀復歸于官矣今却以鈔回換則愈致子虛矣則是當官只重銀不重其鈔此復致虛一也或更造銀鈔以一伯當元寶二伯遞漸收回見鈔蓋事久則變變則通輕重相濟之法也不然其利

病又當與中統原議立法者如張介夫王紹明等講明舊法以定新行如此年載間庶可復舊使資財大柄常操於上權不移於下矣

### 論鹽法

竊詳調度鹽法以便民為心者莫若於所轄州縣量其數多寡將原認課額均分依已定價錢一十四兩一錢仰各處管民官設立鹽官赴運司關支鹽貨置局發賣納舊課關新鹽挨次送納其沿路腳錢於各處鹽局

之官用已錢出備却於發賣鹽價上搭帶仰各道按察司不時計點多餘之數

既分鹽課為正額聽從各處從實發賣中有比別路賣不盡去處督勒本處須管驗合關數目依限關支課亦依期送納何故當原驗民戶多寡均分食鹽之家既等緣何却有不盡數目防有私鹽生發仰各路正官提調不致阻滯正課亦不須設立巡鹽官擾民其先行賣訖去處必須再來關支是為增餘近年以來人人增添食

鹽既多別無虧失止有增羨可不勞而辦也

一官為調度者從省部差有根脚慎行止諸錢穀人克規措所官聽運司節制於用糧去處設立許諸人赴倉送納或米或粟納獲米鈔赴規措所關引支鹽近見運司官差規措官於南京等處不問人之貧富有無抵業九一抽分虛立文契指於某處中納糧斛其實將引到家不問價直高低貨賣了當或償舊債或納官錢或別作營至今五七年間錢糧不能到官者不可勝計深為

未便今者止合明出榜文召募諸人於所措倉分先行  
送納糧斛納獲米鈔然後赴規措所支引次後來關鹽  
釐勒監主母得刁蹬停滯立便支發似此別無阻礙鹽  
法大行倉廩充實不須和糴和中豈小補哉

一長蘆本處除收米粟外並不得收受諸物止收寶鈔  
赴萬億庫送納止收米粟者以備御河上下官為支持  
不收諸物者諸物官司無用中間作弊不無阻礙鹽法  
若以收鈔納鈔其便有三一則鈔法通快二則革去舊

弊三則官民兩便

一便商賈為利者許諸人赴場買引關鹽釐勒監主不得刁蹬客旅最為急務蓋禁官吏不得買引賣引是也既許諸人興販官吏亦用已錢何故不可若使本管官吏得買其間客旅深為未便課程不能恢辦何故鹽價貴則官吏盡數拘買客旅不能得買鹽價賤則官吏並不收買客旅謂曾赴倉場不能得買嘗被耽悞又知鹽價遲滯亦不興販虧損官庫皆此之由又官吏買鹽先

揀離場近便去處次揀潔淨乾白好鹽又不依序先行  
撓支使客旅人等無所措手其弊不能一一徧舉竊惟  
鹽場天下號為爭利之所況本管官吏乎蓋防微杜漸  
尚有不能禁者以官物為已有之資放縱由我不戒  
哉

一運司上下大小請俸人員近七百名其中虛設者大  
半行戶部都轉運司之名可易為提舉鹽使司大使副  
使各一員次以管勾催煎足以辦集自然官減俸省亦

便利之一端也

一解州池鹽天然自成不同清滄犯本煎造費用浩大  
往年陝西運司為課額重大立法頗峻山谷遠人不知  
禁忌食既艱得未免私煎冒販事發到官情罪不小往  
往有破家戕生者良為可哀昔隋初罷酒坊通池鹽鹽  
井之利與民共之至今稱為仁政若於見定解鹽價直  
內更為減免分數使民易得食用亦國家惠民而不費  
之一端也



輝竹還民

竊見衛輝路輝州園竹皆係百姓自來栽植置買物業  
軍站差徭仰之出備自姜毅建言將頃畝官量見數斫  
伐四六抽分民得六分官又拘取量給價直當時百姓  
已是不堪近年以來不依時月不問去留恣意斫伐盡  
行枯廢其合得價錢給既非時多不完備又巡竹人等  
絡繹往來稍有疑似恐嚇錢物事非一端往往有破家  
失業者致百姓顧視竹值甚于仇讐竊詳天之生物本

以養人乃反為害豈造物意哉且量頃畝無多抽取四分以之輸官未為大益百姓得之實非小補合無將上項園竹依舊令民為主官不抽分出備一切差役氣力亦寬弛山澤之禁不奪民利之美事也若謂於干係官竹法有礙據輝竹造到器物令給引印烙亦可通行其見設提舉司並不將竹園耨時名為辦課轉以侵擾百姓營治已私為務亦宜罷去令總府就便管領其省官吏息民擾實為便當

分間官占民田

一總庫將東鹿縣民田以為官地約一千四百餘頃每歲包納麥課每畝麵三斤合無除免明諭百姓使為永業

一去歲取勘到滑州御麥地畝約八百餘頃中間多係軍站農民祖業莊產種養年深今來一例打入數內理合分間民田令依舊為主

定奪官地給民

一京兆路州郡所有營盤草地極廣舊為探馬赤牧馬地面近年遷往西州屯駐其悉為開空地畝并隨路營盤草地空濶去處量給側近無田農民耕種併贍不足禁約侵擾百姓

一每歲鷹房子南來所經州縣市井為空因官吏非理凌辱百姓畏之過於營馬及去又須打發撒花等物深為未便乞嚴行禁約以安吏民


一四萬戶軍馬遇有調度經過去處嚴加禁約不得非

理騷擾致驚農民責所在達嚕噶齊巡護勾當但有失事坐所委官罪

一冀州管內河西軍戶閒處村落不時騷擾如強耕田白采桑欺凌農民等事告發到官司縣不能追理至元十七年省院已曾差官究治此其顯然也合行嚴切禁約不致別有侵漁

一隨處監官非奉上司文移不得一面將門攤定課額上擅行添搭數目

一御河上一切官司阻礙客旅船隻不能通快如開  
關錢漫河索岸例等事乞悉行禁約



秋澗集卷九十

欽定四庫全書

集部

秋澗集卷九十一至  
三

詳校官侍讀學士<sub>臣</sub>沈威

侍讀臣孫球覆勘

總校官降調編修<sub>臣</sub>倉聖脉

校對官編修<sub>臣</sub>錢棫

謄錄監生<sub>臣</sub>高明理



欽定四庫全書

秋澗集卷九十一

元 王惲 撰

事狀

翰林院不當以資例取人

竊惟人材不出政事文章而已政事但曾諳練尚可勉為至於文章自非天材有學者不可強為今翰林職掌人等樂其安簡占處名位守以歲月以次而遷有從書

寫至修撰待制者今後合無從本院精人材之選為勾當不宜循遷以塞賢路

定奪黃河退灘地

一黃河兩岸多有退灘閒地有塔察大王位下頭目冒占作投下稻田令側近農民寫立種佃官文字每歲出納租課自餘不得開耕竊詳河水走卧不常今日河槽明日退灘安得為投下屬地今後合無將一切退灘地面許令諸人開耕種蒔實為便益

舉耶律張商焦四相事狀

一竊見前中書左丞相耶律鑄中書左丞張文潛前安西王府王相商挺秘書監焦仲益皆係朝廷勲德天下重望方今之務以親賢為急此之求訪疎遠如四相者識達政體綜練時宜若使之叅預大政必能裨補缺漏有所廣益傳稱圖任舊人共政此之謂也

復許諸人陳言

一中統元年許諸人陳言當時主意不為徒然蓋一則

舉知羣下休戚之情二則視時政得失之弊三則見人材可用之實今政務方殷惟慮廣求直言採議得失今後合無復許諸人陳言內設詳定奪等官使掌其事

舉明宣慰胡祗通事狀

竊見前荆湖路副使宣慰胡祗通自中統元年至今數  
歷中外二十餘年所至皆以能稱其識時應務通方有  
為求之時輩不可多得誠經濟之良材時務之俊傑也  
內外劇職皆可迭居今居閒日久理合起復以應清朝

之選乃天下公論非卑職之所得私也

議司獄官

竊見隨路所設司獄官致恤囚徒最為切務蓋使暮夜不致疎虞寒暑罔令失所飲食以時醫藥無缺此緣當罪不使苦楚無聊損傷人命此其職也近年多以年老無能之人使充其任致獄事狼籍囚繫失所是與不設等爾若選得如往年大都路司獄劉彥祿十數人使之盡心獄事或今後應重囚未斷非理獄死者治司獄等

罪如此庶仰副朝廷哀矜庶獄之本意也

禁約興利無效等人

竊見近年開挑溜萊路石河致死損夫役甚衆終不能成事竊詳若輩妄開利孔明知無成萬一有效功歸一已不成害及衆人所該之家其將何罪山東之民至今咨怨今後若復有如此妄言僥倖之人宜嚴行禁約如見役興工者將來無驗合無量事重輕究治庶免傷財害民之悔又安知非姦人之計可不審慎之哉

議大名券軍

竊見大名見屯生券軍一萬二千餘人不及三年所費錢糧至甚浩大米一千萬石鈔七萬餘錠若上司近前別無驅用宜同往年熟券軍發還南中使分隸諸翼以備邊防其中若有年老者放還為民不宜使仰食縣官

坐糜經費

總三萬大名一萬五千  
衛輝路五千太原五千

理財事狀

即今包銀課程茶鹽之數歲入不貲用度不患缺少所

當更張者在于一切管掌之人染漬舊習中間多方掊取盡入私門官不得用民實受敝使國家虛受重利之名切要立法革弊使民力蘇息取之不致用乏

馬政事狀

竊謂三軍之本以馬為先今遇有用度不免和買拘刷和買官吏作弊拘刷則遠駭觀聽乞請於塞垣水草宜牧之地分立羣牧使通政院專掌其事

預備事狀



除有司常例支持外振武屯田輸粟補官最為上策易  
稱君子儲戎器以備不虞兼預備則造作如法犀利可  
用晁錯謂甲不能禦矢與無甲同矢不能入堅與無矢  
同可不重慎今後合無將隨路常課再行整點督勒使  
成造如法於上書寫官匠姓名以考其程於所須去處  
起庫收貯如是庶得造作如法不致臨時併造多不如  
法朽鈍不堪用度

為審斷罪囚事狀

竊見隨路淹禁罪囚極多省部自從以來遠踰年歲今  
追銀者有人填撫者有官檢災亡者有使未聞曾差一  
官審理罪囚者古人稱遭遇旱災多緣刑獄淹延所致  
即目已是秋分乞精選精詳官員曉知刑名者同按察  
司官分路前去審錄歸斷一切獄囚恐亦感召和氣之  
一端又使百姓具知省部不獨於錢穀留意也

為革部符聽偏辭下斷事狀

竊見部吏符文之弊謂如甲以田宅告部便以偏辭有

理斷付甲主乙復上訴新吏不照先行却以乙辭有理  
即付乙主路官知其徇弊欲從理長者歸給二人各倚  
原符互相不服其兩造或赴察司陳告照卷明見亦欲  
與之改正又緣省例部斷者不許輒改以致耽悞有累  
年經歲不能杜絕者乞請上司定奪歸一毋令止憑偏  
辭輒下斷語庶免人難

開種兩淮地土事狀

一竊見黃河迤南大江迤北漢水東西兩淮地面係在

前南北邊徼中間閒歇歲久膏肥有餘雖有居民耕種  
甚是稀少宜設立大司農司招集大江南北無產業人  
民驗丁力標撥頃畝令一定住坐為立官給牛隻農具  
差稅並不取要若成就後別議定奪如此不數年間開  
耕作熟貧民既得濟虛地又行內實萬一緩急以食以  
兵皆可倚用

祝香百門山神事狀

一輝米準差者二千和買又不下二三千石又淇水係

是御河上源一切漕運供給大都甚有功用比之濟瀆及物濟國潤民之功非細據上源水神似宜特降香火以答神休

司官不勝任者即行奏代事狀

照得條畫內一款按察官聲迹不好者即行奏代今南北察司廿道每司正官與首領人員除新任未滿者是遷調員數常幾于半材不易知安得人人而當之然即其所知於初選時稱停搭配不致偏重可也其已除而

不勝者若姑息待滿是知其無能令徒占位次月費俸料養資歷而已於司事何益乞請令監察上下半年巡行督察之歲取其功罪之尤者明著之以示天下不次陞黜一二人所謂臺諫急則監司警監司警則郡縣肅誠激勸賢否振勵衰弊之一法也

精選首領官員事狀

近年憲司首領官多取自雜流有案牘文墨絕不通曉者其懦者備員素餐强者挾私害公紊亂官府若今後

止於息任州縣八品七品職官內選兼該儒吏通曉世  
務風采人望出總幕之右者使充可也且憲司職雖糾  
強其體面全是禮法二者為用不同管民參佐衝撞辦  
集為能若必其取強梁跋扈務尚口吻者是無良之人  
假其重勢使之行私耳伏乞詳思以存大體

添書吏奏差人員祿食資歷事狀

竊見按察司書吏奏差人員據照掌文案糾察等事其  
品雖微其職甚要今百物湧貴俸稍不足以育廉賢愚

混淆資敘不足以激勸循名責實似有所難惟其養之厚故可責之重乞請將祿食資歷再行定奪稍得加重久則人自為勸若責罰黜退其將何辭

關支俸錢事狀

竊見遷轉官吏例攜幼扶老千里區區而就一官照得十八年正月內朝廷令州縣依舊與俸却為各處官無見在至今有未關支者是國家需恩如常而州縣不蒙均惠方餬口不贍而責曰爾無貪吾有法豈理也哉今



後乞請將隨路百姓納到俸錢另行收貯專以按月支付庶幾官吏日得養廉易於責辦

罷孫招討戶

一孫招討戶自都督史權鎮鄧州時投拜約八百餘戶名之曰射生戶即日散處襄鄧西山一帶合行分屬所在州郡為民當差不致別生事端

罷南陽屯田戶

一南陽府屯田三十戶往年亦曾言其當罷其後省差

官與河南宣慰司一同前往屯所勘當定奪其本管官見戶齊斂鈔四兩打發來官以此却言不罷便至今依前屯種理合罷散兼南陽縣民該驛程在城見管當差戶止十餘戶遇有一切遞轉差役委不能當若將上項屯田戶放還為民甚為便當

罷規運硝減山楂等官

一隨處見立規運所硝減局并河泊山楂山場等官侵漁百姓其害非一謂如一切販買山貨等物其賣主已

有認辦課程買主赴務起稅及其貨賣又行依例商稅  
今來山楂等官鎖關山路或半道巡捉更行驗物抽分  
至於來自他所經過地方不憑關引取要錢物稍涉疑  
似監收鎖索百方侵擾竊詳山野小民貲本輕微仰之  
經營以供一切差役今者有此重併實不聊生所立州  
府為上司設置辦課衙門坐視亂行又不敢問致內負  
既屈控告無所據上項一切創立局司侵奪民利等事  
理合革罷以慰民心

定奪儒戶差發

照得丁酉年欽奉聖旨節該中選儒生若種田者輸納  
地稅買賣者出納商稅開張門面營運者依行例供出  
差發其餘差發並行蠲免又照得中統二年欽奉聖旨  
節該已前聖旨裏如今咱每的聖旨裏華善伊囉勒琨  
先生達實愛滿例裏漢兒人河西秀才每不揀甚麼差  
發休著秀才的功業習者欽此至元十三年蒙上司差  
官試驗分揀原籍除差儒人該試中儒人內兩丁近下

戶計撰克太常寺禮樂戶竊見試中儒人戶內多有戶  
下餘丁不曾就試官司收係當差又有因故不及就試  
儒人亦行全戶收差若蒙將原籍試中儒人戶下餘丁  
不曾就試戶計照依丁酉年試驗儒人聖旨體例全免  
本戶差發外及因故不及就試儒人乞差官再行試驗  
試中者依例免差黜落者收係當差實為受賜外有至  
元八年欽奉聖旨保勘到委通文學續報倚差儒人於  
至元十三年亦行就試中選若蒙依例除差以為後勸

薦前御史康天英狀

早膺劇任備見長材當官有通變之方持論熟經事之  
慮考據實迹委號良能如憲臺初立首以材望擢拜御  
史繼授南京幕職時攻取襄樊本官支持餽運務繁益  
辦若以材能可以從政八路之間少見其比自秩滿居  
閒恬於仕進于今四年抱用未伸中外嘆惜伏惟聖朝  
方致理有為之秋如天英者不宜使才德空老田間以  
遺明時之用理合舉明以激貪鄙

保郝彩麟狀

竊見故翰林侍讀學士國信使郝經奉使亡宋幽囚十有六年以沈鬱致疾還朝未幾隨即物故據以勞死事誠當優恤其家今嗣子彩麟年長負學卓有所立似宜超等擢用以酬父勞且為立功立事者之勸

申明宣慰使陳祐狀

蓋聞忠義者天下之大閑聖王常推而褒之所以砥礪生民為當世不忠者之勸竊見故中奉大夫浙東道宣

慰使陳祐厯事兩朝家無儋石迹其為官舉皆善政生而竭匡濟之忠歿而有砥礪之效孤身遇寇無路可生奮然不去為國扞賊甘心白刃正色就死雖李司徒之握節死事顏魯公之抗志捐軀無以過也至使越之部民感愴忠節萬口一辭願留葬會稽世奉其祀自非精誠洞貫儼動一時何能致此其於助世教厲薄俗豈小補哉況忠義者國家之元氣所宜養而不可衰也今本官淪忠泉壤不蒙顯異竊為朝廷惜焉伏惟哀憐推而



褒之不惟於贈典殊常將見仗義守節之臣自茲為不  
少矣嗣子夔今為福建路行軍千戶蓋出特旨不由門  
資次子皋未仕通文學有孝行如錄之從政必有可稱  
亦旌顯之一端也

修理大都南京石經事狀

三聖人之教其揆則一尊其師重其教此理之當然也  
竊見大都南京廟學所有九經石刻刊琢極精近年以  
來舊制既廢舉皆散落於荒烟草棘間日就摧圯甚可

寶惜且經之遺制自漢唐至今歷代聖王無不尊崇修  
理蓋重夫經世大法故也今海宇混一方息馬論道之  
時據上項石經理合修立以彰國容兼所費不過夫匠  
灰石而已只係有司一言力耳

論黃河利害事狀

夫古人作事慮未然不治已然治未然用力少而收功  
多況預備不虞古之善教也河為中國經瀆遷徙不常  
自古為患非小川細流可比竊見今夏自中堡村南卧

去京城廿里而近撞園水三百餘步勢湍悍舊築月堤一蕩而盡又自河抵京北郊地勢漸下南北爭懸七尺之上中間土脈疏惡素無堤防固護以捍水衝又見犯去處不下五六十步南接陳橋六丈故溝至甚寬浚北勢既高水性趨下斷無北泛之理故識者云已隱犯京之勢似非過論也若向前霖潦大至瀑汎之際意欲所之崩摧潰決其害有不可勝言者每歲有司規畫不過今夏役夫數千明年興工半萬縷水築堤以應一時極

其所至僅能防備淦水終非緩急可恃得濟之用但幸其不為蓄耳況大梁自古雄鎮今又為江淮總會要津日當修理不可任河作祟視為尋常萬一侵犯豈惟使民居蕩析且廢通漕控制之利民之大命又所係有重焉者蓋開封祥符陳留通許等數縣之地耕種不下數萬餘頃若漫為淀濫歲計先失民何以生此最可慮也又聞往年兩次南犯酸棗陳橋二門止是支流水小京尹錫吉圖們行省崔斌等極力堵閉幾不能塞況今大

河正流直指南卧常人尚慮將漸為患而增卑培薄分  
流殺勢之議其可後哉今體訪得河自臺頭寺西東接  
杞縣西界兩勢平無槽岸行流虛壤中故卧南卧北大  
勢走作所以漸為京城害者不出此百里間而已若能  
舍小就大廣為規制如前金新衛所修石岸者遮障奔  
衝使東過三汭散為巨浸可毋慮也當職竊詳每歲興  
工築隄防捍真成戲劇恐徒費人工損踐民田其為河  
防經久之事曾無少補如蒙以國家大計論之河防之

議其說甚多合行重為講究方來利害舍小就大廣為  
規制以圖一勞永逸之舉實為便當不然據要害去處  
建立祠廟專使以重禮禱祭仰賴洪庥庶回神眷使河  
有定流不致傷財動衆亦拯災禳福之一端也

秋澗集卷九十一

欽定四庫全書

秋澗集卷九十二

元 王惲 撰

事狀

郊祀園丘配享祖宗事狀

臣謹言伏念我國家列聖相承奄有天下六十餘載今  
海宇一統自堯舜漢唐以來未有如此之盛茲蓋陛下  
神聖天縱孝治日隆以不世出大有為之資臨御有道

故也然所有未舉大典在臣子分禮宜建言所謂方今大典郊祀是也何則孝莫大于嚴父嚴父莫大于配天自堯舜以來至于金宋上下二十餘代之間莫不郊祭天地及五方帝神以配父祖蓋尊之至也祖宗之聖重熙累洽郊祀之事未暨舉行者緣禮文弗備有不遑及者今陛下即位二十餘年功成治定昭事天地尊禮百神畧無虛歲若大禮一行將咸秩之位合禘於圜丘豈不大通神明降福穰穰者乎又念自古偏方小國尚皆



力行尊顯祖宗以為天地百神之主恭惟陛下大廕護  
助際海內外盡付所覆而上帝簡在陛下之心又大可  
見矣不於此時報本顯祖以答天庥其於繼繼承承之  
道終為曠闕兼舊有典章自金章宗一行之後湮沒遺  
逸不絕如縷即今就有三二老儒并收拾到亡宋典冊  
講究張皇一旦有成將萬倍於尋常使陛下垂旒被袞  
對越上帝與三五同功並接數千歲之統於上新萬方  
耳目於下使王道明而隆典興天地察而上下順聖政

聖教不待嚴肅以成以治所謂聖人作而萬物覩也豈不盛哉由是而觀自古聖帝明王續承先業所任之責未有重於此者故傳曰國之大事在祀與戎惟陛下裁察

鈞州建原廟事狀

蓋聞益廣宗廟大孝之本欽惟太上憲宗皇帝雖聖靈在天而神功武烈見於郡國者固當昭布遠暢以盡中外臣民之敬今河南鈞州係先太上皇帝王業所基戰

勝龍興之地蓄靈擁休赫焉斯在宜營建原廟俾親王  
歲奉嚴禋以彰聖德光昭造邦之本誠嗣天子顯揚祖  
宗之至孝也

牒司為中丞王通議病愈狀

竊見前行臺中丞王通議去歲春自揚州赴闕奏事回  
偶患病疾百日作闕今過暮年已是平復即日居家讀  
書以教子為事其於已私似為便安若以方今選人  
材之切如王通議者才術德望理合起復未宜投置散

地若不舉明伏慮憲臺未知久遺錄問

保士人杜之材賈宗傳狀

竊見新鄉縣布衣賈宗傳胙城縣中選儒士杜之材二  
人性沈厚端亮有文辭而通世務讀書三十餘年安貧  
守道以耕稼自給未嘗枉己妄有干進其於士論畧無  
瑕玷誠丘園之秀民恬退之良士也今者幸遭明時選  
材為急理合薦舉使拔出民間以備內外之用必能行  
其所學不負所守以之振士氣而抑僥風不謂於時無

補

彈保定路總管侯守忠狀

檢會到中書省欽奉聖旨定與提刑按察司條畫內一  
款節該所部內應有違枉並聽糾察除欽遵外今體察  
得保定路總管侯守忠粗魯無識凶暴有名恣意亂行  
略無忌憚不任以職猶恐敗羣重之以官凶焰何奈以  
致不遵朝省對抗使人詈辱同僚穢言肆口耽悞經賦  
縱而不征引帶私人結而成黨取能聲擅斷職官樹威

風敗壞官府其吏民枉被陵暴者畏其凶惡不敢聲訴  
所望察司稍為抑按今又為阻壞如此中外嗟嘆莫不  
失望叅詳本路近在都南實為要郡所轄一十五處軍  
民約十萬餘戶據根本內北首恩澤固民心非良吏莫  
可今使凶暴如此之人臨民辦事正猶以豺狼守羊無  
不傷之理據此合行糾彈

體復教授李龍輔狀

今體復得本官併與原保相同當職又覩其為人雅厚

清純臨事通方有如修整廟學訓導生徒舉皆有法雖淹滯年深未嘗妄有干求所謂有德有能可以從政者也兼知得北京南京教授俱蒙遷調理合陞擢以激士風

舉楊德柔狀

竊見南路錄事司軍戶楊德柔天姿秀穎不妄干進累厯筦庫繼任本路照磨及與魯府提控案牘檢法等官俱有廉能之稱其為書學尤所精妙方今少見其比今

名在兵籍常以家貧執役行間譬之象犀珠玉要以不宜塵迹泥沙此士論之所共也卑職按巡河南見之廣座其學問行已並與所聞相同據此合行保呈伏乞樞密院照詳施行

論王學士合陞承旨事狀

竊見翰林兼國史院承旨中奉大夫姚樞今已身故據本院翰林學士嘉議大夫王磐人品風節追配前賢議論文章發明聖學方崇儒重道之秋膺養老乞言之眷



若陞授承旨職名以德以材實孚中外之望據此合行具陳中書省照詳施行

保舉提舉張從仕狀

竊見前慕陽鐵冶提舉司從仕郎同提舉張從仕賦性良明為人謹厚兼通儒吏歷仕年深掌財賦而藹廉潔之稱論刀筆而有裁遣之敏加之嫉邪處正識達時宜誠為有用之材皆係廉知之實理合薦舉以俟陞擢

特選行省官事狀

竊見福建所轄八路一州四十八縣連山負海民情輕  
譎無常困苦者多其在邊隅實為重地存心撫馭尚慮  
失宜縱暴侵漁不無生事緣收附以來官吏以朝廷遠  
貪圖賄賂習以成風行省差擬職官又多冗雜擅科橫  
斂無所不至致政壞民殘草寇竊發指以為名下愚無  
聊因之蟻附其嘯聚去處附近貧民盡為剽掠內地軍  
興不免蹂踐中間雖有憲司糾治梢末尚艱所行其於  
根本有無如之何者甚非朝廷包荒一視同仁之意求

其治要無過得人為先且府州司縣等官雖不能一一  
精擇據見闕行省官僚如平章左丞二府名位特選素  
著清望簡在帝心文足以撫綏遺黎武足以折衝外侮  
盡忠所事籌策有方不以利賄為心使刪除積弊省剔  
冤濫肅清邊陲庶幾民安事靖日趨治域以之招諭則  
彼心可服以之進兵則我直人信今賊之所以滋蔓為  
梗者正以內缺官僚乘虛有名故也可不深計而熟慮  
哉設或不爾雖濟濟布列上下相蒙以私害公民之用

敝猶焚火溺水日益深且熾矣得失之機實係于此卑職叨居風憲觀此其敢緘默自惜

論草寇鍾明亮事狀

竊見福建一道收附之後戶幾百萬黃華一變十去其四今劇賊鍾明亮悍黠尤非華比未可視為尋常草寇誠有當慮者今雖兩省一院併力收捕地皆溪嶺囊橐其間出沒叵測東擊則西走西擊則東軼凶焰所及煽惑殺掠為害不淺招降則賊心不一攻圍則兵力不敷

又兼春氣動時雨行彼負固我持久恐猝難成功似宜  
益兵力置總戎一節制進奔合圍勢至窮蹙其將自斃  
惟復特差重臣宣示恩詔招諭撫慰以安中外兩者之  
行庶幾必有一得

保醫儒胡璉狀

竊見衛輝路醫儒胡璉資性詳明學術有素凡經治療  
多獲痊安據本路見缺醫學教官若令璉補充內當教  
育諸生必有開益據此合行移牒請照驗施行

保儒生韓弘牒草

竊見衛輝路錄事司後進儒生韓弘性溫雅有士行素明經學兼習詞章嘗試以事議論容止舉皆可觀據茲良碩宜備時用以勸後來今將本人所業文字錄連在前合行移牒請照驗施行

論教官俸給事狀

竊念天下之事得其人則治不然雖有紀綱法制將衰恭而不振此必然之理學校者育材出治之本也見承

奉御史臺劄付該諸州府皆有受勅教授仰免差儒戶  
內選餘閒子弟入學修習儒業仍令各路正官朔望省  
視及按察司官選試行義修明文筆優贍可以從政者  
然後解貢此誠為國育材以備文武內外之用固非細  
務也却思各路教授多係老儒宿德白首一官不沾寸  
祿良可哀也今欲修習之業旬省月視責有成效亦以  
難矣合無照依國子學醫學教官一體頒降俸給不然  
據見有學田去處於每歲收到子粒內官為明定斗石

月充廩給以濟貧乏外無學田去處准復別議定奪如此卹勸庶幾官無虛設之名學有賓興之實將見文風蔚興有不期然而然者矣

論開光濟兩河事狀

省議即從  
所議罷役

會驗近欽奉詔書內節該自今以始煩民之事一切革去便民之政次第舉行欽此今體知得省部符文准前工部尚書李鄂囉齊等呈開洗東平濟州等河道并剏修閘堰可役人夫一萬餘名計該八十六萬五千餘工



合用石材地丁等物且舉德州一處所著該白棗木九千餘條每條長六尺徑四寸石材九千二百八十餘段每段長四尺濶三尺厚七尺計其餘該著數目比之德州宣止數倍雖云和買目今驗戶椿俵上戶十段中戶不下五七餘塊並不見發下價錢即要赴所止送納日夜催併殆不聊生緣石材地丁非民間素有積蓄之物計其採買工價搬運脚力上戶已不能辦下戶將何以給有破產逃竄而已深為未便近年創開海道益都淄

萊濟南東平東昌等路百姓已是疲乏死損數多哀痛之聲至今未息今又東平等一十餘處供辦上項夫役等物比夫海道之役亦為不輕是齊魯魏博數路之民被擾無遺又念前政苛撓去歲不收民多流亡加以今秋風水蟲蛇災傷所在缺食恐又聞此役復業者轉行不來見在者又將逃避山東重地不可不慮兼此役浩煩未審曾無奏聞儻已後不能成功虛費國力百姓實受其敝將來誰任其責然此却訪聞得李尚書等官見

行安置土壩九座合無候來春土壩修成更為責委深知水利官員一同相視光濟兩河於深淺不常時月斷流走沙去處試驗土壩委能積深浮重轉漕糧船迤久通行快便然後修理石壩尚為未晚仍於出產石木去處官為差雇夫匠採打用度不致取辦一時逼迫靠損人難卑職謬當言責以鎮靜為職親觀其事不敢不言合行移牒請照驗備申御史臺照詳施行

論濟南路所轄達嚕噶齊合遷轉事狀

竊見濟南路所轄州縣見任達嚕噶齊內承襲勾當及已滿年深未經遷轉者一十三員今朝省庶政稍有未便務從一新若將上項達嚕噶齊人員於本投下州縣內依例遷轉實為便當庶不致恃賴久任樹黨行私官吏因之受弊據別路未經遷轉者亦合一體定奪

保李提學昌道狀

伏念俊造秀異皆稟氣之清造物者靳固未嘗多得今有其人使徒老明時誠為可惜竊見前上都路提舉學

校官濟南李師聖經明行修不妄干進文筆性學皆有古風及叩以政事議論通暢皆切時之務可謂年高德邁學富才優韜晦城市不求聞達當今朝省以選材為急如師聖者若擢以風憲或置之館閣俱有所長可收實用

論濟南經歷闕員事狀

凡厥政務必官吏相須而後能濟若官有其人而吏獲其用二者得一則事無留難竊見濟南路所轄州縣一

十三處路當山東要會事務頗繁所賴首領官調議規畫為功今本路經歷知事俱各闕員間有經歷孔文貞省部別行差委東平等處勾當却於本司署銜請俸將近暮年又本府憲司親臨於上今檢得簿書未完事理九百餘件久乏其人責以事有兼辦實亦勢之所難理合作急選注材能使補其闕庶不致有耽悞一切事務

秋澗集卷九十二